

REGLUR

um einfaldari tollmeðferð á vörum.

1. gr.

Til að flýta fyrir tollafgreiðslu á innfluttum vörum er tollstjórum heimilt samkvæmt reglum þessum að taka upp einfaldari tollmeðferð og heimila greiðslu aðflutningsgjalda þegar við móttöku tollskjala en láta endurskoðun þeirra fara fram eftir á.

2. gr.

Innflytjendur sem óska eftir einfaldari tollmeðferð skulu uppfylla eftirtalin skilyrði:

- a. Innflytjandi stundi atvinnurekstur og hafi til þess tilskilin leyfi, svo sem verzlunarleyfi, sbr. lög nr. 41/1968, iðnaðarleyfi, sbr. lög nr. 42/1978, eða önnur leyfi sem krafist er vegna atvinnustarfsemi.
- b. Innflytjandi hafi tilkynnt Hagstofu Íslands um atvinnustarfsemi sína og hafi verið færður á fyrirtækjaskrá, sbr. lög nr. 62/1969.
- c. Innflytjandi hafi tilkynnt skattstjóra um starfsemi sína samkvæmt 5. gr. laga nr. 50/1988, um virðisaukaskatt.
- d. Innflytjandi hafi að mati tollstjóra sýnt fram á við gerð og frágang aðflutningsskjala að hann hafi til að bera fullnægjandi þekkingu á lögum og reglum sem gilda um tollmeðferð vara.

Tollstjóri getur krafist innflytjanda um staðfestingu á því að skilyrðum í a. - c. -lið 1. mgr. sé fullnægt.

3. gr.

Innflytjandi, sem um ræðir í 2. gr., skal á þar til gerðu eyðublaði sækja skriflega um heimild til einfaldari tollmeðferðar til tollstjóra þar sem lögheimili hans er samkvæmt fyrirtækjaskrá. Í umsókn skal tilgreina eftirfarandi:

- a. Nafn, kennitölu og aðsetur.
- b. Virðisaukaskattsnúmer.
- c. Hverjir hafa umboð til þess að skuldbinda innflytjanda með undirritun á aðflutnings-skýrslu fyrir hans hönd, riti hann ekki sjálfur undir hana. Rithandarsýnishorn fylgi umsókn.
- d. Aðrar þær upplýsingar sem eyðublaðið gefur tilefni til.

Innflytjandi skal þegar tilkynna tollstjóra allar breytingar sem verða á upplýsingum samkvæmt framanrituðu.

4. gr.

Innflytjandi skal einungis óska eftir einfaldari tollmeðferð á þeim vörum sem hann er viss um að séu rétt tollflokkaðar og rétt verðlagðar. Ennfremur sé hann viss um að öll tilskilin innflutningsleyfi og vottorð séu til staðar. Ef í vörureikningi er notað verð- eða vörulistanúmer í stað vörutegundaheita getur tollstjóri krafist innflytjanda um nánari upplýsingar, t.d. vörulista með lýsingu á viðkomandi vöru.

Vörur, sem undanþegnar eru aðflutningsgjöldum samkvæmt sérstakri heimild, notaðar vörur svo og sýnishornasendingar og aðrar vörur, sem sendar eru innflytjanda að kostnaðarlausu, skulu ekki tollafgreiddar samkvæmt þessum reglum. Slíkar vörur skulu tollafgreiddar samkvæmt almennum reglum og metnar til tolls ef þörf þykir á.

5. gr.

Innflytjandi skal gefa til kynna í aðflutningsskýrslu að óskað sé eftir einfaldari tollmeðferð.

6. gr.

Komi annmarkar í ljós við endurskoðun tollskjala skal skora skriflega á innflytjanda að bæta úr þeim innan ákveðins tíma og láta skriflega í té skýringar og þau gögn sem tollstjóri telur þörf á að fá. Ef eigi er bætt úr annmörkum á fullnægjandi hátt skal tollstjóri áætla tollverð vöru og aðflutningsgjöld samkvæmt meginreglum tollalaga.

7. gr.

Komi í ljós við endurskoðun tollskjala eftir á að aðflutningsgjöld hafi verið ofgreidd, en öll skjöl og fullnægjandi upplýsingar liggja fyrir til að hægt sé að koma við leiðréttingu, skal tollstjóri þegar leiðréttá útreikning gjalda og endurgreiða ofgreidda fjárhæð, en skýra skal innflytjanda skriflega frá ástæðu leiðréttingarinnar.

Séu aðflutningsgjöld hins vegar vangreidd skal tilkynna það innflytjanda skriflega og tilgreina jafnframt ástæður. Gera skal kröfu um að vangreidd gjöld skuli greidd innan 15 daga frá dagsetningu kröfu. Séu gjöld ekki greidd innan frestsins skulu dráttarvextir innheimtir frá tollafgreiðsludegi. Um ákvörðun og útreikning dráttarvaxta skulu gilda ákvæði 1. mgr. 9. gr. og 10 gr. vaxtalaga nr. 25/1987.

8. gr.

Heimild til einfaldari tollmeðferðar skal gilda við tollafgreiðslu í hvaða tollumdæmi sem er.

9. gr.

Tollstjóri getur að undangenginni aðvörðun fellt niður heimild til einfaldari tollmeðferðar, tímabundið eða að fullu séu sakir miklar, ef innflytjandi

- a. uppfyllir ekki lengur skilyrði þau sem um ræðir í 2. gr.,
- b. sinnir ekki áskorun um greiðslu gjalda samkvæmt 7. gr.,
- c. afhendir ítrekað ófullnægjandi tollskjöl, sbr. m.a. 6. gr. eða
- d. hefur af öðrum ástæðum að mati tollstjóra fyrirgert rétti sínum til einfaldari tollmeðferðar á vörum.

Ákvörðun tollstjóra samkvæmt þessari grein skal vera rökstudd skriflega og er fullnaðar-ákvörðun.

10. gr.

Ríkistollstjóri ákveður gerð eyðublaðs, sbr. 3. gr., og getur jafnframt gefið nánari fyrirmæli um fyrirkomulag einfaldari tollmeðferðar hjá tollstjórum.

Tollstjórar skulu skrá þá innflytjendur sem þeir veita heimild samkvæmt 3. gr. í tölvukerfi tollsins og allar breytingar á upplýsingum, sbr. 2. mgr. 3. gr., svo og ákvörðun um sviptingu leyfis samkvæmt 9. gr.

11. gr.

Reglur þessar eru settar samkvæmt 148. gr. tollalaga nr. 55/1987, með áorðnum breytingum, til að öðlast gildi þegar í stað. Jafnframt eru úr gildi felldar reglur nr. 367/1984, um sama efni.

Fjármálaráðuneytið, 19. desember 1990.

F. h. r.

Magnús Pétursson.

Guðrún Ásta Sigurðardóttir.